

Rozáriu bíbliku iha finalidade atu tulun medita mistériu ida-idak iha Maromak nia Liafuan nia roman. Depoizde mistériu ida-idak, pasajen bíblika liga ho mistériu ne'e ita fahe ba parte ki'ik sanulu ne'ebé ita sei lee molok reza Ave Maria.

MISTÉRIU KSOLOK NIAN

Anunsiasaun Anju nian ba Maria

1. Maromak haruka anju Gabriel ba knua ida Galileia nian, naran Nazaré (Lc 1,26).
2. Ba feto-raan ida ne'ebé hakotu tiha ona ba mane ida naran José, husi David nia uma-kain; feto-raan ne'e naran Maria (Lc 1,27).
3. Tama tiha iha nia uma, anju dehan: "Rahun di'ak, feto kmanek wain tebes! Na'i ho ó (Lc 1,28).
4. Rona tiha lia ne'e, nia laran taridu hodi husu ba nia an rasik kumprimentu ne'e katak sá loos (Lc 1,29).
5. Anju dehan ba nia: "Keta tauk, Maria; basá ó hetan rahun di'ak tebes iha Maromak futar oin" (Lc 1,30).
6. Ó sei ko'us no tur ahi oan mane ida. Ó sei hanaran Nia Jezús" (Lc 1,31).
7. Nia sei sai ema boot; sei hanaran An Na'i aas liu hotu nia Oan... Nia ukun sei rohan laek" (Lc 1,32-33).
8. Maria husu ba anju: "Ne'e sei sai oin sá loos, basá ha'u la hola mane?" (Lc 1,34).
9. "Espíritu Santu sei tun ba ó no Na'i aas liu hotu nia kbiit sei hamahan ó... ba Maromak, la iha buat ida ne'ebé la bele" (Lc 1,35.37).
10. Nune'e, Maria dehan: "Ne'e sá, Na'i nia atan oan mak ne'e. Halo tuir ita liafuan ba!" (Lc 1,38).



Maria nia vizita ba Isabel

1. Iha loron hirak ne'ebá Maria hiit an lalais ba foho, ba knua ida iha Juda. To'o tiha Zacarias nia uma, nia kumprimenta Isabel (Lc 1,39-40).
2. Wainhira Isabel rona Maria nia lia, kosok oan book an iha nia knotak ho ksolok. Isabel nakonu ho Espiritu Santu (Lc 1,41).
3. Isabel hahú ko'alia, dehan: "Ita boot di'ak liu feto hot-hotu! Ita boot nia oan di'ak liu! (Lc 1,42).
4. Rahun di'ak ba ida ne'ebé fiar katak lia ne'ebé Na'i hateten sei sai tuir loos duni." (Lc 1,45).
5. Nune'e Maria dehan: «Ha'u klamar hahí Na'i, ha'u neon haksolok iha Maromak ha'u Maksoin. Basá Nia haree nia atan feto ne'ebé folin laek» (Lc 1,46-48).
6. "Houri ohin ba oin ema hotu sei dehan ha'u rahun di'ak. Basá Ida ne'ebé bele buat hotu halo buat kmanek wa'in tebes mai ha'u" (Lc 1,48-49).
7. "Nia naran santu. Nia laran luak houri otas ba sira ne'ebé hamtauk Nia" (Lc 1,49-50).
8. "Nia hamonu ukun na'in sira husi sira nia tur fatin, foti fali ema ki'ik sira" (Lc 1,52).
9. "Nia haraik buat di'ak hotu ba mukit sira, haruka riku sira bá ho liman mamuk" (Lc 1,53).
10. "Nia tau matan ba nia atan Israel hodi hanoin fali nia laran luak" (Lc 1,54).

Jezús nia moris

1. Wainhira sira sei iha Belém, Maria nia loron atu tur ahi to'o daudaun (Lc 2,6).
2. Nia tur ahi nia oan mane boot, no falun nia ho neras (Lc 2,7).
3. Maria hatoba nia iha balada han fatin, basá la iha fatin oan ida ba sira iha uma laran (Lc 2,7).

- 4 Iha fatin ne'ebá iha bibi-atan balun, ne'ebé kalan kalan hein sira nia bibi iha rai luan (Lc 2,8).
- 5 Na'i nia anju mosu ba sira. Maromak nia glória nabilan iha sira leet (Lc 2,9).
- 6 Anju dehan ba sira: "Ha'u lori liafoun di'ak ida ba imi... Ohin iha David nia sidade foin moris ba imi Maksoin ida, katak Kristu Na'i" (Lc 2,10-11).
- 7 Sinál atu imi hetan Nia mak ne'e: imi sei hetan kosok-oan ida falun ho neras no toba iha balada han fatin" (Lc 2,12).
- 8 Ema matenek balun husi loro-sa'e to'o mai... Tama tiha uma laran, sira hare ki'ik oan ho Nia Inan Maria (Mt 2,1.11).
- 9 Loke tiha sira nia ai-balun, sira hasa'e ba Nia sira nia buat ksolok; osan mean, ai-ben morin no mina morin (Mt 2,11).
- 10 Maria rai hela buat sira ne'e hotu, hodi hanoin didi'ak iha nia laran (Lc 2,19).

Aprezentasaun Jezús nian iha templu

- 1 Sira lori labarik ba Jerusalém atu saran Nia ba Na'i, nu'udar hakerek iha Lei Moisés nian (Lc 2,22).
- 2 Iha Jerusalém moris ema ida naran Simeão. Nia ema loos ne'ebé hamtauk Maromak; nia hein Israel nia ksolok (Lc 2,25).
- 3 Nia simu lia husi Espíritu Santu katak nia sei la mate molok nia haree Na'i nia Kristu (Lc 2,26).
- 4 Wainhira nia aman-inan sira lori Jezús atu halo tuir ukunfuan, nia simu Kosok Oan iha nia liman, hodi hahí Maromak (Lc 2,27-28).
- 5 Simeão dehan: "Ha'u nia matan haree ona Maksoin ne'ebé Ita Boot hadia ba povu hot-hotu" (Lc 2,30-31).
- 6 "Naroman atu leno jentiu sira no povu Israel nia glória" (Lc 2,32).
- 7 Simeão dehan ba Maria, nia inan: "Haree ba, labarik ne'e mosu mai atu hatun no foti ema barak iha Israel" (Lc 2,34).
- 8 Surik ida sei sona borus ita-nia fuan" (Lc 2,35).
- 9 Iha mós feto duina ida, naran Ana. Nia mai hodi hahí Na'i no ko'alia kona ba Labarik ne'e ba sira hotu ne'ebé hein Jerusalém nia maksoin (Lc 2,38).
- 10 Labarik oan sai boot ba daudaun no maka'as liu tan, hakonu ho matenek, no Maromak nia grasa hela hamutuk ho Nia (Lc 2,40).

Jezús lakon no hetan fali Nia iha templu

- 1 Tinan-tinan Jezús nia inan-aman sira ba Jerusalém iha festa Páskua (Lc 2,41).
- 2 Festa hotu tiha, sira fila hikis ba uma, maibé Jezús hela iha Jerusalém; nia aman sira la hatene (Lc 2,43).
- 3 Sira buka Nia iha parenti no maluk sira leet. Tan la hetan Nia, sira fila fali ba Jerusalém hodi buka Nia (Lc 2,45-46).
- 4 Liu tiha loron tolu, sira hetan fali Nia iha templu, tur hela iha ema matenek sira leet, hodi rona no husu sira (Lc 2,46).
- 5 Ema hotu ne'ebé rona Nia hakfodak ho nia matenek no nia liafuan (Lc 2,47).
- 6 Nia inan hateten ba Nia: "Ha'u oan, tansá Ó halo nune'e mai ami? Ó-nia aman no ha'u neon susar tebtebes hodi buka Ó" (Lc 2,48).
- 7 Nia dehan ba sira: "Tansá imi buka Ha'u? Imi la hatene katak Ha'u sei hela iha Ha'u Aman nia uma?" (Lc 2,49).
- 8 Maibé sira la komprende lia hirak ne'e katak sá (Lc 2,50).
- 9 Jezús tun fali hamutuk ho sira ba Nazaré, hodi halo tuir sira nia hakarak (Lc 2,51).
- 10 Nia inan rai buat hirak ne'e hotu iha nia laran (Lc 2,51)